

Pauro Timoteo bo ziwatahakazo

Pauro siakyiukrēnikitsa hurukwy eze niapykyrykze Timoteo bo ziwatahakazo. Timoteo tatse wata ziknazukniki. – Atsoko pikbezenaha – nikara. Deus Pauro ziapewywyky iwaze katsa kino niwatihi tanymyryky.

¹ Uta Pauro. Timoteo ikia bo papeu humo piwatahaka. Tubabatu Sesus Kiristu kytsa bo zikpeha, kape niy:

– Ikiā sizubatsa bo tsimy. Deus wasania ty tsimytsaso. Kytsa kaharere bo hyŷ mykaranaha zeka kahumo sispirikporētsa moziknaha asaktsa tahawahi Deus tuk mynapykyryknaha tsimy – niy.

² Timoteo ikiakta katse wata tsikyzyk. Utakta ikia humo kamypokzitsiarēta. Deus myzo, Sesus Kiristu mypehakatsa sibo atsyhyryze mopamykysokoze ispe my:

– O kazo Timoteo humo amypokzitsiukta. Ihumo tsimypokzitsiarēta. O kazo ahumo tsakurēta mozik – my. Iwa Deus bo atsyhyryze mopamykysoko.

Hawa Deus humo kakurēta my. Abaka kasoho ahabo piwataha.

³ Kyze uta Deus bo motsasoko:

– O kazo ikia zuba tsamysapyrēta – mykara. Deus tsyhyryze pitsumuēhīkī mykara. Pykyhytu iharere bo hyŷ mykara. Iharere humo batu kaspiriktsokdahu. Myzotsa niwatihi iharere bo

hyĩ ziknakaranaha. Deus bo mopamykysokoze ikia soho ty okoroze unata ibo mopamykysoikik. Ikia soho humo mytsaty mynakara.

⁴ Ikparakze tsasukatsihikrēta. Tsikpuziuku ana bo hi mytsaty mykara. Ikia bo mynakozore tsihikik. Ikia bo mynakozore zeka kakurēta. Kakurēta hĩ.

⁵ Ikia Sesus humo tsimyspirikpoko ana bo hi mytsaty mykara. I humo aspirikporēta hĩ. Tubabatu aikiwa Roide atatsahi Sesus humo tispirikporētatsa. Iwaze aje Eunise kino niwatihi ihumo tispirikporētatsa. Abaka ikia kino niwatihi ihumo tsimyspirikpoko ana humo hi kahyrinymyrēta.

⁶ Iwatahi abo motsasoko. Tubabatu Sesus tuk-tsa tuk ispirikpokota tsikyzik. Uta katsyhyrypetsa ty aharek humo paik paik icy. Ispirikpokota tsikyzikke katsyhyrypetsa ty aharek humo paik paik icy, Sudeutsa sopykwy ty icy. Ana bo hi mytsatyzotyкта! Deus zikwy abo izumu. Ihyrikoso atuk mynapykyryk. Pykyhytuty ihyrikoso tuk tsimyzuruku. Izikwy humo tsimyzuruku. Ana bo hi mytsatyzityukta! Iwaze izikwy humo tarabajiu tsimykara.

⁷ Deus hyrikoso mybo izumu. Ihyrikoso humo batu mypyby. Deus mybarawy nizuknikita tazikwy mybo inazukmywy. Izikwy humo katsa sizubarētsa humo mymypokzitsirētsa. Katsa mypetu mysopyk iwatsahi mysapybyitsa ba tsinakaranaha. Deus hyrikoso humo mypetu mysopyk.

⁸ Kytsa asahi Sesus harere bo batu hĩ nikaranaha sakyriukrēnikitsa hurukwy bo zikoktyhyryknaha. Sesus harere iktsasokoze

katsipa humo zikoktyhyryknaha. Abaka sakyriukrēnikitsa hurukwy eze tu mopykyryk. Iwatatu kahumo batu asikpyby. Sesus harere humo kino niwatihi batu asikpyby. Sesus harere humo sinini mykara. Ikia kino niwatihi Sesus harere tsimytsasokoze sinini tsimykara. Iwatuze sinini tsimykara Sesus harere tsimytsasoikikze Deus patsumuēhĩ. Sinini tsimy zeka atahi papunihikwyky.

⁹ Deus kino botu ityryk nimywatawyhik. Tapara mybarawy eze ky nizukni iwaze bijoikpe nizukni iwaze botu nimywatawyhik. Katsa mysapyrētsa humo batu myty watawy. Myhumo tsimypokzitsiarēta ana humo hi nimywatawyhik. Deus tihi:

– O amy ty isapyrēnikia ty sibo nyny my – niy. Katsa mysapyrētsa humo batu nyny aha.

– Asahi Sesus Kiristu harere bo hyỹ mykaranaha iwatsahi myspirikporētsa tsimoziknaha iwaze amy ty isapyrēnikia ty sibo nyny my – niy.

¹⁰ Taparaka ana soho humo batu myhyrinomyry abaka myhyrinomyrētsa. Sesus Kiristu humo tsinymyrykynaha. Sesus mymyoktyhyrykta humo tsinymyrykynaha. Sesus botu mybarawy bo inasik iwatahi tsinymyrykynaha. Sesus kino isapyrēnikia ty mybo nyny mykara. Sesus nihyrikosokda. Iwaze harakykbyri zuruze nahyrikosokdanaha humo batu mypyby. Sesus wasaniha nitsasoko.

– Tsimyhyrikosokdanahaze namyhyrikpowyzo. Mywahi Deus tuk

tsimypykyryknaha – niy. Iwaze katsaktsa Sesus humo tsimyspirikponahaze iwatsahi tsimyyhyrikosokdanaha humo batu mypyby.

¹¹ Deus botu zikwatawyhik. Sesus kape niy:

– Wasania ty motsasoko katuktsa tysihyrinymyryky – niy. Tysihyrinymyrykyta my. Sesus zikwatawyhik iwatahi mykzohotsa.

¹² Ana humo hi sinini mykara. Sesus wasaniha humo sinini mykara. Kytsa Sesus harere humo batu sispirikpo asahi ziksukyryknaha. Utakta Sesus humo kaspirikporēta. Ihumo batu kasikpyby. Abaka Sesus zikny iwatahi pikspirikpoko hỹ. Ata kino tsihyrinymyrēta. Atahi imysapyrēnikita. Nawa ha ty ibo nyny iky tahi ana hi myziperyky. Hawa ha taeze Sesus myziksizo naha humo kaspihikrēta iwaze kabo nynyzo my.

¹³ Deus wasania ty ikia abo iktsasoko. Deus harere anahi abo iktsasoko hyỹ tsimykara. Hawa zikzuruku naha humo kawata tsimyzuruku. Tyzikwatuku Sesus humo aspirikpotohikta! Kytsa humo tsamypokzitsiarēta. Iwa tsimyzuruku. Sesus Kiristu tuk zeka iwa tsimyzurukunaha.

¹⁴ Deus harere ty pykyhytu tynakara. Iharere iktsasoko. Ana bo hi mytsaty tsimykara. Ba aspiriktsokda huk. Deus hyrikoso mytuk mynapykyryk. Atahi mymytsumuēhĩkĩ iwatsahi Deus harere humo ba zikspiriktsokdanaha.

Iwa Pauro Timoteo bo ziwatahaka.

¹⁵ Kytsa Asia ezektsa zikarekbaiknaha. Ana hi botu tsiwaby. Situk Pisero zikarekek. Eremosenes kino niwatihi zikarekek.

¹⁶ Onesiporo zuba ziktsumuēhĩkĩ. Kabo inakozore sakyrikrēnikitsa hurukwy eze kabo nikozore.

Kahumo batu isikpyby. Atahi zikykuwyky. Ihumo kakurēta ikykara. Iwaze Deus pe iky:

– O kazo Onesiporo itukytsa humo kino niwatihi tysipokzitsikikta tsimy – iky.

¹⁷ Atahi Homa bo niukuru. Izumuze paikpa zikberiki iwataatu kabo zumu.

¹⁸ Tapara Onesiporo Epeso eze tuze ziktsumuēhĩkĩ. Ana soho humo hi tsahyrinymyrēta. Iwatahi Deus pe my:

– O kazo ikia Onesiporo tsimypokzitsikikta. Sesus myziksizoze ihumo tsimypokzitsiarēta – my.

Iwa Deus bo itsyhyryze my.

2

Sesus Kiristu tukta babata tsipunihikrēta mozik.

¹ – O Timoteo ikiakta katse wata tsikyzyk. Deus Sesus Kiristu mymypokzitsiki. Katsa Sesus tuktsa tsimaha. Mymypokzitsiki, iwatahi batu apyby. Amo wasani tsimykara! – my.

Tubabatu uta ahyrinymyryky.

² Amy ty ahyrinymyryky naha ty tsiwabyba hỹ. Aba ustsā tsimysihyrinymyryziuku. Kytsa tysiny asaktsa aharere pykyhytu pinymyrykynaha. Ahyrinymyryky naha ty atsatu mysihyrinymyryziuku. Bykyze asahi atsatu mykaranaha ustsā kytsa mysihyrinymyrykynaha. Kytsa aharere humo motsasoziukunaha pykyhytuty mykaranaha.

³ Sesus tuktsa sizubarētsa sinini mykaranaha. Ikia sinini tsimykara zeka batu apyby. Ikia sodadu wata tsimozik. Ikia Sesus Kiristu sodadu wata tsimozik. Iharere bo zuba hỹ tsimykara.

⁴ Sodadu tapehatsa harere bo zuba hyỹ mykaraze tawata. Ikia niwatihi Sesus harere bo zuba hyỹ tsimynakara iwatahi sodadu wata tsimozik. Iwa tsimy kara. Sodadu amy iakparawy ha humo batu yhỹ ziky. Tapehatsa harere bo zuba hyỹ mynakara. Ihyriziktsokzawy humo zuba mynakara. Ikia iwahaty tsimyzuruku. Sesus apehatsa my. Iwaze amy akparawy ba yhỹ ziky, iharere bo zuba hyỹ tsimy kara, sodadu wata tsimozik.

⁵ Iwaze usts a kytsa motururuknahaze tapara pomoze mozihikik. Iwaze sisopyk humo yhỹ nikara iwaze motururuknaha, niwazuba nikara. Ikia atawata tsimozik amy Deus myzehikik nahaty zuba tsimy kara. Amy ty Sesus mynazihikik naha ty zuba tsimy kara, iwatahi tapara zumuta wata tsimozik.

⁶ Iwaze usta maku tatsuhuk mozikezoze. Atahi tadisahawy sukpesapy myzekezokoze tapara tadisaha. Ikia niwatihi Sesus Kiristu tsyhyryze hyriziktsokzawy humo tsimy. Hyriziktsokzawy humo tykta! Kytsa mysihyrinymyryky iwa ahyriziktsokzawy. Iwaze Sesus asoho humo:

— O ikia tsamysapyrēta — my. Iwaze ikia Deus harere bo hyỹ tsimy kara sodadu wata. Ikia tyzibytuhukutu hawa Sesus mozihikik yhỹ tsimy maku kytsa nitururuknahaze tapara izumuta wata. Ikia Sesus tsyhyryze hyriziktsokzawy humo tsimy kara maku itsuhuk eze wata.

⁷ Kaharere bo mytsatyziu tykara. Amy kaharere piwatawyky atsatu mypehatsa mykara. Atahi pahyrinymyryky.

⁸ Deus wasaniha abo nitsasoko. Sesus Kiristu soho bo mytsaty tsimykara. Sesus Kiristu ni-hyrikosokda. Deus hi zihyrizikpowy iwaze ispitu niyzikzo. Dawi tsekoka Sesus niy. Ata hi zihyrizikpozo. Deus wasaniha nitsasokoze ana hi iktsasoko.

⁹ Deus harere iktsasoko ana humo hi sinini mykara. Kytsa sakyriukrēnikitsa hurukwy bo zikorokiknaha. Karikutsitsiwytsa ty zikektsawarakanaha. Iwatahi batu pāo my. Iwatatu Deus harere sihumo ba zikpyk. Deus sohowy ba pyk ziky.

¹⁰ Iwatahi sinini mykara. Kytsa asahi Deus nisi-watawyhik sityhyryze sinini mykara, iwatsahi Deus wasania ty piwabykynaha. Sinini mykaraze iwatsahi Sesus humo sispirikporētsa. Sesus Deus bo mysioқтыhyryk katsa mywatsa Deus bo mysioқтыhyryk. Simysapyrētsa moziknaha. Deus tuk asatu mynapykyryknaha tahawahi Deus tuk mynapykyryknaha.

¹¹ Hawa botu katsaktsa tsiwabynaha ana harere wasani my. Utakta niwatihi ahabo iktsasoko aba motsasoko.

— Kytsa Sesus pokzi mymybanaha zeka iwatsa tu ituk namyhyrizikpobawyo.

Tsinahyrizikponaha zeka ituk mywahi tsinapykyryknaha.

¹² Sinini tsimykaranaha zeka Sesus Kiristu pokzi mypehakatsa watsa tsimoziknaha.

Katsaktsa kytsa pe tsimaha zeka: “O utakta batu Sesus tukta my.

Sesus batu kanyhy” tsimykaranaha. Iwaze Sesus niwatihi mype my: “O uta kino batu kanyhy

my.

Asahi batu katuktsa my” niy.

¹³ Iharere bo hyŷ ahabyizeka iharere humo my-napykyryk.

Iharere wasani my.

Tapara nitsasoko atsatyty mykara
iharere tisapyrēna hŷ.

Tawahi nitsasoko iwaze atsatu – mykara.

Deus tsumuēhĩtsa tsimysapyrēta.

¹⁴ Ikia awabytsitsa bo tsimy. Iwa tsimysi-hyrinymyryky. Mytsatyziu tsimy Deus pawabyky. Deus okzeka tsimysihyrinymyryky. Ispe tsimy:

– Pykyhytutaha kytsa! Ahaharere humo ahape ty peha peha byitaha iwa zeka ustsakytba mysisapybyrinaha. Iwazeka kytsa ba ziksitsumuēhĩnaha. Kytsa pahawabykynahaze Sesus humo batu sispirikpo. Iwazeka ahaharere humo ba zikspirikponaha – tsimy. Iwa awabytsitsa bo tsimy.

¹⁵ Wasani tyzurukukta! Pykyhytuty wasani tyzurukukta! Iwaze Deus asoho tihi:

– Atakta tsimysapyrēta. Kaokzeka wasani mykara – my. Wasani tsimyzuruku zeka batu asikpyby. Deus ahyriziktsokzawy bo iktsa myzeka batu asikpyby. Deus harere ty kytsa tysihyrinymyrykik. Tysihyrinymyry baba iwa abo my.

¹⁶ Kytsa asahi siharerewabymybaranikitsa ana ka Deus batu iakparawy. Ikia kino batu situk tsimypamykysoko asaktsa kytsa ba ziksitsumuēhĩ. Sesus humo sispirikporētsa ba ziksitsumuēhĩ. Iwa siwabytsitsa batu

imysapy nikaranaha. Iwaze sibo ba ziktsaso. Siharere ba ziktsaso. Asaktsa ustsá kytsa mysisapybyrikinaha.

¹⁷ Sispirikpowy mykõrõrõtsa watsa. Inury piokbakanaha. Hawa inury mykõrõrõtsa humo piokbakanaha, kytsa Sesus humo ba sispirikpo tahaspirikpowy zimiyikiknaha iwatsahi sispirikpowy mykõrõrõtsa watsa. Asahi myhyrinymyrykynaha zeka kytsa Sesus humo batu sispirikpo. Situk estuba maku Imeneu inarokota, usta Pireto inarokota, iwatsa sispirikpowy kino mykõrõrõtsa watsa. Sispirikpowy humo kytsa Sesus harere bo batu yhỹ niaha.

¹⁸ Wastuhu Sesus tuktsa siharere ziwabykynaha. Asahi siharere bo asiba yhỹ niaha. Iwaze Sesus harere humo asiba ziakbatanahaze batu yhỹ niaha. Asa tihi:

– Kytsa niakbakanahatsa botu bijoikpe bo nidoknaha – mybarapetu nikaranaha.

– Deus mybarawy ezektsa nisierekek – mybarapetu nikaranaha. Kytsa anahi ziwabynahaze paikpa mytsaty nikaranaha. Kytsa jakara bo nizaranahatsa watsa niyziknaha. Sispirikpowy humo paikpa mytsaty nikaranaha. Iwatsahi wastuhu Sesus tuktsa Sesus harere bo asiba batu yhỹ nikaranaha.

¹⁹ Katsa hiba Deus harere humo tsinymyrykynaha. Ustsá kytsa simyspihikbatanikitsa sihumo batu mospirikpo. Deus harere zuba tsiwabynaha. Mypehakatsa tahyrytsa humo tsihyrinymyrẽta hỹ. Aty motsasoikik:

– O katsaktsa Deus hyrytsa – tsimaha. Deus ispe my:

– Ahasapybyri tsimoewynaha! – niy. Iwa Deus tahyrytsa bo motsasoko.

²⁰ Myporosuktsa mywahoro eze sizubarētsa tsimykaranaha. Wastuhu zuba pibytuhukunaha tu tsimykaranaha. Utsa batu. Katsa mymyikaha boktsa zubatsa myporosuktsa sisapyrētsa tsimykaranaha. Mymyikaha humo morosuk tisapyrēna tsimykaranaha. Katsaktsa myporosuktsa watsa.

²¹ Hawa katsa morosuk tisapyrēna tyakse tsihikik mymyikaha boktsa zubatsa, Deus hyrizikt-sokzawy humo mymykse tsihikik. Deus okzeka wasani tsimoziknaha. Iwaze Deus mype my:

– O ikiahatsa katsumuēhĩtsa tsimoziknaha. Iki-ahatsa humo kakurēta. Amy humo wasani tsimykaranaha! – mykara. Iwatsahi morosuktsa watsa tsimoziknaha atakta mymyikahaze tsimykaranaha. Deus mysoho:

– O ikiahatsa tsamysapyrētsa tsimaha. Iwatahi ikiahatsa katsyhyryze tarabaja tsimykaranaha – my. Tarabaja tsizubarēna humo mykyzodiharētsa tsimykaranaha kahumo kytsa Sesus harere mysihyrinymyryky my. Mysapybyitsa tsikykaranaha botu tahamoewyhyk ana humo hi Deus tsakurēta hỹ.

²² – O Timoteo ikia ba mykyryburuktsa wata tsimykuru! Asahi imysapybyitsa zuba mykaranaha. Utsa okeza mysihuahuanaha. Ikiakta hawa wasani zuba tsimyzuruku. Imysapybara humo ka ikiakta batu yhỹ ziky. Sesus Kiristu humo aspirikpohukta! Kytsa

tysipokzitsiki. Kytsa humo batu akryi. Maku tsimysapyrēta Deus bo mopamykysoko. “O Deus myzo tisapyrēna humo tsiktsumuēhī my”. Ikia niwatihikta ituk tawata tsimysapyrēta tsimozik — my.

²³ Kytsa asahi sipehatsitsa zuba batu siharere ty batu tyso. Ikia sibo tsimypamykysoko zeka tsipahabetsakwynaha.

²⁴ Mypehakatsa tsumuēhītsaktsa ba zikmybet-saknaha. Kytsa mymypokzitsiki. Deus harere mysihyrinymyryziuku. Kytsa harere piwabyziuku, iwatahi mysihyrinymyryziuku.

²⁵ Aty myharere ty wabyziu zeky byizeka batu ziksibetsak. Wasanikia ty tsimy. Sibo tsimytsasoko. Aibani tozeka ja aharere humo simysapybyitsa mykaranaha mysimoewyhiknaha Deus mysitsumuēhī iwatsahi simysapybyitsa mykaranaha mysimoewyhiknaha. Aharere humo sispirikporētsa moziknaha.

²⁶ Tubabatu hyrikoso sapybara pehakatsa nisipihikbataka iwaze tahawerekywy nahatsa watsa niaha. Siraratsa tahawerekywy bo nipupunaha. Astsatu kytsa hyrikoso sapybara pehatsa harere bo yh̄ mykaranaha. Siraratsa tahawerekywy naha tsawatsa. Iwa kytsa sispirikpobyitsa zeka hyrikoso sapybara pehatsa harere bo yh̄ nikaranaha. Iwa mozurukunaha. Bykyzehu tozeka ja aharere humo hyrikoso sapybara pehatsa bo ba yh̄ zikaha. Amy ty wasania ty zuba yh̄ mykaranaha.

3

Aibani zuba ziharawybabaka tsihokdahařna

iwatsahi pykyhytutaha.

¹ Kaharere bo mytsatzyiutaha. Sesus harazetu kytsa sinini mynakaranaha. Sesus tuktsa Deus harere bo hyŷ mynakaranahaze tsihokdaharēna mozik. Kytsa simysapybyitsa mykaranaha sihumo tsihokdaharēna mozik.

² Kytsa asa zuba mynakaranaha. Sisorekanikitsa. Sisakimyijarētsa mykaranaha okyrysaro tsihitsa mozihikiknaha. Motsasokonaha – Katsa zuba myhyrinymyrētsa – mybarapetu mynakaranaha. Myhyrinymyrētsa mytsaty ahabyitsa mynakaranaha. Siharere-wabymybarētsa. Kytsa tahanamy ty harape bo nyny maha zeka:

– O ikia tsimysapyrēta ana humo hi mykurētsa – iwahaty batu harere. Tahazotsa harere bo batu ma zikaha. Deus harere humo batu wabyziu zikaha.

³ Tatukytsa humo niwatihi tahasopyksapybyiri mynakaranaha. Batu aty tohi humo simypokz-itsiu. Kytsa sizubarētsa humo sisopyksapybyitsa mynakaranaha. Zikaharapeziunahabyitsa. Batu tahapetu sisopyk iwatsahi tahamysapybyrity mykaranaha batu tymoewy. Sizokdirētsa. Zikasihokyknahabyitsa.

⁴ Situkytsa sisukyrytsitsa bo mysioktyhyryknaha. Mysibanaha bo. Simytsatyhybyitsa tu iwatsahi batu simysapy mynakaranaha. Motsasokonaha:

– O uta zuba wasani. Uta myhyrizikwani – mykaranaha. Deus humo batu siakparawy iwatahi Deus batu iaku. Asa zuba sakurētsa. My-nazihikiknaha ty zuba mykaranaha.

⁵ Asahi:

— O katsaktsa Deus hyrytsa — mybarapetu mykaranaha. Deus zikwy humo batu sihyrinomyry. Amy mozihikiknaha humo zuba mykaranaha. Deus harere bo batu hỹ mynakaranaha. Deus hyrikoso humo batu sihyrinomyry. Ikia situk tsimykara zeka tyserekeкта my.

⁶⁻⁷ Wastuhu wytykyryk mysispihikbatakanaha. Wytykyryk asizahi batu mytsaty zikaha. Mysimiwykynaha. Siwakyrizerẽza.

— O katsaktsaza Deus harere tsipinomyrynaha — mykaranaha. Batu sihyrinomyry. Tsikaeni zuba zinomyrynaha. Iwazahi batu sispirikpo Deus harere bo batu hỹ zikaha. Iwaze kytsa asahi mybarapetu ziknakaranaha wytykyryk pe maha. Siwahoro bo kytsa papatu ziknapupukunaha. Inapupunahaze imysapybara ty ziknasyhyrinomyrykynaha. Iwazahi wytykyryk Deus harere humo batu sispirikpo.

⁸ Tubabatu Moises Deus harere baba ziknat-sasoko. Sãbores Sãnes ahatsa Moises harere humo batu siakparawy. Deus harere baba humo batu siakparawy. Kytsa simyspihikbatanikitsa watsa. Astatsu mykaranaha. Kytsa bo mybarapetu mykaranaha, iwatsa tu Deus harere humo batu siakparawy. Sesus harere humo batu sispirikpo.

⁹ Kytsa sihyrinomyrytsa pe:

— Batu amy tohi ty isty hyrinomyry — nikaranaha. Taparaktsa tubabatu astatu Sãnes Sãbores ahatsa bo niwatihi ziknakaranaha. Astatu kytsa bo ziknakaranaha. Iwatsahi sizubarẽtsa tihi:

– Batu amy tohi ty ziksihyrinomyrynaha iwatsahi batu mywabyhy – nikaranaha.

Abaka kasohowy asiba nepyk wabyty tsimy.

¹⁰ O Timoteo hawa mozuruku naha humo tsahyrinomyrëta. Kytsa nasihyrinomyryky anaha humo kino tsahyrinomyrëta. Hawa Sesus humo kaspirikporëta ana humo kino niwatihi tsahyrinomyrëta. Hawa kytsa humo batu kasakpare uta hi nasipokzitsiki ana humo kino tsahyrinomyrëta. Kakubyrisorokrëta. Hawa sinini ikykara ana humo kino tsahyrinomyrëta.

¹¹ Kytsa asahi Sesus humo batu sispirikpo asahi zikziksininiwykynaha. Ātiokia eze sinini ziknakara. Ikonio eze niwatihi sinini ziknakara. Risitera eze niwatihi sinini ziknakara. Sesus hi mypehakatsa zikbetesaka. Ziktsumuëhîkî. Ana humo hi tsahyrinomyrëta.

¹² Katsaktsa Deus harere bo hyÿ tsimykaranaha zeka kytsa mymysininiwykynaha. Asahi Sesus Kiristu humo batu sispirikpo iwatsahi mymysininiwykynaha.

¹³ Kytsa asahi batu simysapybyitsa mykaranaha mysihyrinomyrykynaha. Simysapybyitsa babatsa mynakaranaha. Kytsa mysispihikbatakanaha. Utsa kytsa kino niwatihi sibo mybarapetu mykaranaha. Paikpa myharape spihikbataikknaha.

¹⁴ Hawa zahyrinomyryky nawa tsimyzuruku. Hawa taparaktsa sihyrinomyrëtsa zahyrinomyrykynaha nawa tsimyzuruku. Siharere wasani my ana humo hi tsahyrinomyrëta. Iwatahi siharere bo hyÿ tynakara.

15 Ikia jabastuze Deus harere papeu humo iwatahaha tsinykyry. Iharere humo tispirikporēta tsimozik. Ana papeu tsipinykyze hawa Deus tuk tsimynapykyryknaha ana hi tsinymyryky. Sesus Kiristu humo tsimyspirikpo zeka Deus bo mymyoktyhyryk.

16 Tubabatu mydiritsa Deus harere ziwatahakanaha. Iharere ziwatahakanahaze Deus zikwy humo sihyrinymyrētsa. Iharere wasani my. Ana papeu tisapyrēna niy. Iwatsahi Deus harere wasani humo tanymyryky. Amysapybyita tsimy kara zeka amysapybyiri ka tsimoewybaik. Aty pimyiki zeka papeu humo amyiwyhy piwatawy. Hawa wasani haty papeu humo mysopyk mymywatawyky. Hawa Sesus tuktsa mozurukunahaze anahi mymywatawyky.

17 Deus tsumuēhĩtsa iharere papeu humo iwatahaha pinymyryky. Deus iakparawy ty zuba pinymyryky. Ana bo zuba Deus tsumuēhĩtsa papeu humo yhỹ mykara. Imysapyhaty zuba mynakara mekywa humo tisapyrēna mykara, Deus harere papeu humo. Utsa niwatihi mysitsumuēhĩ. Nanabyi humo niwatihi wasani mynakara myziwatawyky Deus harere papeu humo. Iwaha hỹ.

4

¹ Abaka Deus okzeka abo motsasoko tsiwabytoktokta! Sesus Kiristu okzeka niwatihi abo motsasoko. Atakta myziksizoze hawa kytsa mozurukunaha soho motsasoko. Atahi kytsa simysapyrētsa pe my:

– O ikiahatsa wasani ziknakaranaha – my. Usta kytsa simysapybyitsa pe my:

– O ikiahatsa batu ahamysapybyitsa ziknakaranaha – my. Iwa kytsa myzubarêtsa pe my. Kytsa sispitutsa pe my iwaze niakbakanahatsa pe kino niwatihi my. Myzubaha pe my. Sesus Kiristu myziksizoze iwa my. Simysapybyitsa ziknakaranahatsa pe my:

– Ikiahatsakta sinini ykarawy bo taha! – my. Anabo mysipehahik. Iwaze simysapyrêtsa pe my:

– O ikiahatsakta pahasapywyky – my.

Iwa myziksizoze tatuktsa tuk my.

² Iwatahi iharere tynatsasokokta! Tsihokdharêⁿaze kino iharere tytsasoikik. Ihokdaha byize kino niwatihi tytsasoikik. Kytsa imyitsitsa tynasi-betsakak:

– O amo imysapybyitsa zeka tysimoewyhikta! Sesus humo tyspirikponahakta! Ahapuni-hikrêtsakta – tsimy iwatsahi simysapyrêtsa moziknaha. Asakparebyijaty. Akubyrisorokok ja tsimy. Iwa tsihyrinomyryky.

³ Bykyzehu kytsa ispirikpowy babata ba ziwabynaha. Iharere atakta batu ziky. Amo siakparawy zuba ana bo hi yhÿ mykaranaha. Kytsa amy zimyikinaha ana ty hi mysihyrinomyrykynaha. Ana hi siakparawy. Iwatsahi sihyrinomyrytsitsa bo piwaby tsihikiknaha iwaze amy ty siakparawy piwabykynaha.

⁴ Deus harere batu siwabyhy. Amy imysapybara zuba piwabykynaha.

⁵ Ikia Timoteo pykyhytuty. Hawa tsimyzuruku naha humo pykyhytuty iwazeka wasani

tsimynakara. Sinini tsimyykaraze tsapunihiokrēta tsimozik. Deus wasaniha tsinatsasoko. Deus zawatawy itsumuēhĩtsa tsimozik, iwatahi tsipitsumuēhĩkĩ.

⁶ Hawaeze ja kytsa pikbezenaha batu sispirikpo. Utakta sirara wata. Tubabatu kytsa siraratsa ty Deus bo nyny ziknakaranahaze tapara nisibakanahaze ky wa. Uta niwatihi hawa eze ja kytsa pikbezenahaze utatu Deus bo katy nyny my Deus pokzi pikbezenahaze Sesus pokzi ba ziktakyri.

⁷ Uta kaokzetuze Deus harere motsasoziuku zuba mynatsasoikik. Sesus humo kaspirikporēta ziknakara. Utsa kytsa kahumo Deus harere bo yh̄y mykaranaha. Sesus Kiristu zikzitsumuēh̄iekik pyk ahabyita ziknakara, zikzibytuhukutu Sesus Kiristu tsyhyryze zikzitsumuēh̄iekik. Hawaeze ja mohyrikosokda amy ty Deus kape ziknakaranaha ty tsizubarēna humo ma ikykara.

⁸ Kakubyrisorokrēta Deus tsyhyryze zikzitsumuēh̄iekik. Hawa kytsa sizubarētsa motururuknahaze tapara estuba siharaze pomo tahi iwaze kytsa ipe maha:

– O ikiakta tsipisapybaka – mykaranaha. Iwa mypehakatsa Sesus kytsa sizubarētsa okzeka kape my:

– O ikia tsisapybaka ikia wasani tsikykara. Deus zabetesaka iwatahi amysapyrēta tsikyzyk – my.

Kakubyrisorokrēta Sesus kasoho humo harereziu mykara. Myziksizoze kasoho kytsa bo iwa motsaso. Mypehakatsa wasani mykara. Hawa tsimyzurukunaha bo iktsa ziknakara. Myziksizoze utsa bo niwatihi:

– Ikiahatsa wasani tsikykaranaha. Deus okzeka wasani tsikykaranaha – my. Iwa motsaso taperytsitsa bo motsaso. Iwatsahi taperyky myziksizo naha humo tsimyzihihiknaha.

Timoteo ikia bo zuba mopamykyso.

⁹ Abaka kabo aidytynykta asukmotsihik zeka.

¹⁰ Kytsa katuktsa zikarekbaiknaha. Demas tanamy bo zuba mytsaty mynakara. Zikarekek zuba. Tesaronika bo niparak. Keresēte Karatas bo niparak. Titu Daramasia bo niukuru iwa nikaranaha.

¹¹ Rukas zuba katuk nitare. Ikiakta Marakos tyziberikta! Ibo tsipomo zeka atuk tyziokty. Marakos Deus hyriziktsokzawy humo piktsumuēhī.

¹² Tikiko pe my:

– O ikia Epeso bokta! – iky. Hyỹ niy.

¹³ Kabo tsinaparak zeka kakpyzazawy tuk tuja. Toroade eze Karapo wahoro eze tihi ikzerekek. Papeu tuktu. Riweros tisapyrēna asahi siraratsa hwyk hi tyzibykyk. Riweros kino tynasibykykta tsimy.

¹⁴ Aresādere zikmyijaka. Atahi pero tuk tarabaja ziknakara. Hawa zikmyijaka naha humo mypehakatsa tsihyrinymyrēta atahi ana sohotyhi ibo mykara.

¹⁵ Ity pykyhytuty ihumo tsimy. Ihumo amytsatyhyhokta tsimykara. Myharere iakparawy byita tsakyriukrēta. Atahi:

– Ikiahatsa ahamysapybyitsa tsimykaranaha – niy. Tsipihobyk zeka amytsatyhyhokta tsimy.

¹⁶ Tapara Sesa abazubata tuktsa okzeka ikt-sasoko utakta kasoho ikt-sasoko. Batu aty tohi zikbetesa:

– O atahi tsimysapyrēta my. Amy imyiki batu mykara – niy. Batu aty tohi iwa kasoho ty batu tyso. Sizubarētsa zikarekbaiknaha. – O mytuktsa tsimaha – mybarapetu nikaranaha. Iwaze Deus tihi sisoho batu hỹ my. Deus ispe:

– O ikiahatsa Pauro tsikzerekbaiknaha. Kaokzeka ahamysapybyitsa tsimykaranaha. Pauro tsikzerekiknaha humo ahamysapybyitsa tsimykaranaha – my.

Iwa Deus sisoho motsaso zeka kasoho humo batu hỹ my. Iwaze utakta Deus bo mopamykysoko:

– O kazo kasoho humo kytsa humo aty kyri kyri byity. Uta sihumo batu kakyri. Asahi zikarikiknaha sihumo batu aty kyri kyri byity – my.

¹⁷ Asahi zikarikiknaha. Mypehakatsa zuba katuk nitare. Atahi ziktsumuēhĩkĩ. Iwatahi Sudeutsabyitsa bo Deus wasania ty motsasoko. Kytsa sizubarētsa Sudeutsabyitsa Deus wasania ty motsasobaka mypehakatsa zikwy ziktsumuēhĩ. Atahi zikoktyhyryk. Kytsa parinita watsa, sakyriukrētsa zikbezekyzykynaha mypehakatsa zikoktyhyryk.

¹⁸ Mypehakatsa, kytsa zikbezekyzykynahaze zikbetesaka. Mohyrikosokdaze pikoktyhyryk ituk kawahi mynapykyryk, mynahyrikpoze Sesus tuk kawahi mynapykyryk. Atahi abazuba sipehatsa mozik. Iwaze sizubarētsa tihi:

— O ikia zuba tsamysapyrĕta awahi amysapyrĕnikita — tsimaha hŷ. Iwa ibo tsimytsasokonaha hŷ.

Myzubaha humo kahyrizikbarĕta.

¹⁹ Uta Pirisira Akiro ahatsa humo kahyrizikbarĕta. Onesiporo itukytsa niwatihi iwatsa humo kahyrizikbarĕta. Iwa sibo tsimytsasoko, sihumo kahyrizikbarĕta hŷ.

²⁰ Erasto Korĭto eze nitare. Teropemo tsimytisapyrĕta iwatahi Miretus eze ikzerekek.

²¹ Ikie kabo tyzumu. Hyritsik wŏbyitu tyzumu hŷ. Katukytsa Euburus, Pudĕs, Rinus, Kaudio ustsas niwatihi iwatsa ahumo tsihapyrykyknaha maha.

Deus pahasapywyky.

²² O Timoteo atsyhyryze Deus bo mopamykysoko ipe mykara:

— O Deus myzo ikia humo Timoteo tsipuni-hikrĕta mozik. O myzo Sesus tuktsa kino niwatihi tysipokzitsiki — my. Iwa atsyhyryze Deus bo mopamykysoko. Iwa hŷ. De.

Pauro

Deus Harere Aibaky Sesus mymyspirikpoko naha

New Testament in Rikbaktsa (BR:rkb:Rikbaktsa)

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

2f0260ea-5969-5180-9ac5-183d63a989f1